

重修政和經史證類備用本草

二



重修政和經史證類備用本草卷第一

已酉新
增衍義

成都唐慎微續證類


纂集經史證類備用本草卷第一
臣曹孝忠奉

敕校勘

序例上

韓保昇云按藥有玉石草木蟲獸五類
直云本草者為諸藥中草類最多也

嘉祐補注總叙



舊說本草經神農所作而不經見漢書藝文志亦無錄
焉平帝紀云元始五年舉天下通知方術本草者在所
為駕一封軺傳遣詣京師樓護傳稱護少誦醫經本草
方術數十萬言本草之名蓋見於此而英公李世勣等
注引班固叙黃帝內外經云本草石之寒溫原疾病之

淺淺此乃論經方之語而無本草之名惟梁七錄載神農本草三卷推以爲始斯爲失矣或疑其間所載生出郡縣有後漢地名者以爲似張仲景華佗輩所爲疑又不然也淮南子云神農嘗百草之滋味一日而七十毒由是醫方興焉蓋上世未著文字師學相傳謂之本草兩漢以來名醫益衆張機華佗輩始因古學附以新說通爲編述本草繇是見於經錄然舊經才三卷藥止三百六十五種至梁陶隱居又進名醫別錄亦三百六十五種因而注釋分爲七卷唐顯慶中監門衛長史蘇恭又撫其差謬表請刊定乃命司空英國公李世勣等與恭參考得失又增一百一十四種分門部類廣爲三十



卷卅謂之唐本草國朝開寶中兩詔醫工劉翰道士馬志等相與撰集又取醫家嘗用有效者一百三十三種而附益之仍命翰林學士盧多遜李昉王祐扈蒙等重爲刊定乃有詳定重定之目並鏤板摹行由此醫者用藥遂知適從而僞蜀孟昶亦嘗命其學士韓保昇等以唐本圖經參比爲書稍或增廣卅謂之蜀本草今亦傳行是書自漢迄今甫千歲其間三經譌著所增藥六百餘種收採彌廣可謂大備而知醫者猶以爲傳行既久後來講求浸多參校近之所用頗亦漏略宜有纂錄以備頤生毆疾之用嘉祐二年八月有詔臣禹錫臣億臣頌臣洞等再加校正臣等亦旣被命遂更研覈竊謂前卅

醫工原診用藥隨效輒記遂至增多槩見諸書浩博難究雖屢加刪定而去取非一或本經已載而所述粗略或俚俗嘗用而大醫未聞嚮非因事詳著則遺散多矣乃請因其疏梧更爲補注應諸家醫書藥譜所載物品功用並從採掇惟名近迂僻類乎怪誕則所不取自餘經史百家雖非方餌之急其閒或有參說藥驗較然可據者亦兼收載務從該洽以副詔意凡名本草者非一家今以開寶重定本爲正其分布卷類經注雜糅閒以朱墨並從舊例不復釐改凡補注並據諸書所說其意義與舊文相參者則從刪削以避重複其舊已著見而意有未完後書復言亦具存之欲詳而易曉仍每條並



以朱書其端云臣等謹按某書云其事其別立條者則
解於其末云見某書凡所引書以唐蜀二本草為先他
書則以所著先後為次第凡書舊名本草者今所引用
但著其所作人名曰某人惟唐蜀本則曰唐本云蜀本
云凡字朱墨之別所謂神農本草經者以朱字名醫因神
農舊條而有增補者以墨字間於朱字餘所增者皆別
立條並以墨字凡陶隱居所進者謂之名醫別錄並以
其注附於末凡顯慶所增者亦注其末曰唐本先附凡
開寶所增者亦注其末曰今附凡今所增補舊經未有
者於逐條後開列云新補凡藥舊分上中下三品今之
新補難於詳辨但以類附見如綠礬次於礬石山薑花

次於豆蔻扶移次於水楊之類是也凡藥有功用本經
未見而舊注已曾引據今之所增但涉相類更不立條
並附本注之末曰續注如地衣附於垣衣燕覆附於通
草馬藻附於海藻之類是也凡舊注出於陶氏者曰陶
隱居云出於顯慶者曰唐本注出於開寶者曰今注其
開寶考據傳記者別曰今按今詳又按皆以朱字別於
其端凡藥名本經已見而功用未備今有所益者亦附
於本注之末凡藥有今世已嘗用而諸書未見無所辨
證者如葫蘆巴海帶之類則請從大醫衆論參議別立
為條曰新定舊藥九百八十三種新補八十二種附於
注者不預焉新定一十七種總新舊一千八十二條皆



隨類粗釋推以十五凡則補注之意可見矣崔鑒者開寶英公陶氏三序皆有義例所不可去仍載於首篇云

新舊藥合一千八十二種

三百六十種神農本草經 一百八十二種名醫別錄

一百二十四種唐本先附 一百三十三種今附

一百九十四種有名采用 八十二種新補

一十七種新定

本草圖經序

昔神農嘗百草之滋味以拯萬民之疾苦後世師祖由是本草之學興焉漢魏以來名醫相繼傳其書者則有吳普李當之藥錄陶隱居蘇恭等注解國初兩詔近臣

總領上醫兼集諸家之說則有開寶重定本草其言藥之良毒性之寒溫味之甘苦可謂備且詳矣然而五方物產風氣異宜名類既多贗偽難別以廼牀當靡蕪以薺茺亂人參古人猶且患之況今醫師所用皆出於市賈市賈所得蓋自山野之人隨時採獲無復究其所從來以此爲療欲其中病不亦遠乎昔唐永徽中刪定本草之外復有圖經相輔而行圖以載其形色經以釋其同異而明皇御製又有天寶單方藥圖皆所以叙物真濫使人易知原診處方有所依據二書失傳且久散落殆盡雖鴻都祕府亦無其本天寶方書但存一卷類例粗見本末可尋宜乎聖君哲輔留意於蒐輯也先是詔命儒臣重

校神農本草等凡八書光祿卿直祕閣臣禹錫尚書祠
部郎中祕閣校理臣億太常博士集賢校理臣頌殿中
丞臣檢光祿寺丞臣保衡相次被選仍領醫官秦宗古
朱有章等編繹累年旣而補注本草成書奏御又詔天
下郡縣圖上所產藥本用永徽故事重命編述臣禹錫
以謂考正群書資衆見則其功易就論著文字出異手
則其體不一今天下所上繪事千名其解說物類皆據
世醫之所聞見事有詳略言多鄙俚向非專壹整正比緣
飾以文則前後不倫披尋難曉乃以臣頌向嘗刻意此
書於是建言奏請俾專撰述臣頌旣被旨則哀集衆說
類聚詮次粗有條目其間玉石金土之名草木蟲魚之

別有一物而雜出諸郡者有同名而形類全別者則參用古今之說互相發明其荻稷之細大華實之榮落雖與舊說相戾並兼存之崖略不備則稍援舊注以足成文意注又不足乃更旁引經史及方書小說以條悉其本原若陸英為蒟蒻花則據爾雅之訓以言之諸香同本則用嶺表錄異以證之之類是也生出郡縣則以本經為先今時所宜次之若菟絲生於朝鮮今則出於冤句奚毒生於少室今乃來自三蜀之類是也收採時月有不同者亦兩存其說若赤箭本經但著採根今乃并取莖苗之類是也生於外夷者則據今傳聞或用書傳所載若玉屑玉泉今人但云玉出於于闐不究所得之



因乃用平居誨行程記爲質之類是也藥有上中下品
皆用本經爲次第其性類相近而人未的識或出於遠
方莫能形似者但於前條附之若搜䟽附於枸杞琥珀
附於茯苓之類是也又古方書所載簡而要者昔人已
述其明驗今世亦常用之及今諸郡醫工所陳經效之
藥皆并載其方用天寶之例也自餘書傳所無今醫又
不能解則不敢以臆說淺見傳會其文故但闕而不錄
又有今醫所用而舊經不載者並以類次系於末卷曰
本經外類其間功用尤著與舊名附近者則次於逐條
載之若通脫次於木通石蛇次於石蠅之類是也總二
十卷目錄一卷撰次甫就將備親覽恭惟主上以至仁

厚德函養生類一物失所則爲之惻然且謂札瘥薦臻
四時代有救恤之惠無先醫術蚤歲屢救近臣酬校歧
黃內經重定鍼艾俞穴或範金揭石或鏤板聯編憫南
土蠱惑之妖於是作慶曆善救方以賜之思下民資用
之闕於是作簡要濟衆方以示之今復廣藥譜之未備
圖地產之所宜物色萬殊指掌斯見將使合和者得十
全之效飲餌者無未達之疑納斯民於壽康召和氣於
穹壤太平之致茲有助焉臣學不該通職預編述仰奉宸
旨深愧寡聞嘉祐六年九月日朝奉郎太常博士充集
賢校理新差知潁州軍州兼管內勸農及管句開治溝
洫河道事騎都尉借紫臣蘇頌謹上

開寶重定序

三墳之書神農預其一百藥既辨本草存其錄舊經三卷世所流傳名醫別錄互為編纂至梁正白先生陶景乃以別錄參其本經朱墨雜書時謂明白而又考彼功用為之注釋列為七卷南國行焉逮乎有唐別加參校增藥餘八百味添注為二十一卷本經漏功則補之陶氏誤說則證之然而載歷年紀又踰四百朱字墨字無本得同舊注新注其文互闕非聖主撫大同之運永無疆之休其何以改而正之哉乃命盡考傳誤刊為定本類例非允從而革焉至如筆頭灰兔毫也而在草部今移附兔頭骨之下半天河地漿皆水也亦在草部今移

附土石類之閒敗鼓皮移附於獸皮胡桐淚改從於木
類紫鑛亦木也自玉石品而取焉伏翼實禽也由蟲魚
部而移焉橘柚附於果實食鹽附於光鹽生薑乾薑
同歸一說至於雞腸繫薑陸英蒟藿以類相似從而
附之仍採陳藏器拾遺李含光音義或討源於別本
或傳效於醫家參而較之辨其臧否至如突屈白舊說
灰類今是木根天麻根解似赤箭今又全異去非取是
特立新條自餘刊正不可悉數下採衆議定爲印板乃
以白字爲神農所說墨字爲名醫所傳唐附今附各加
顯注詳其解釋審其形性證謬誤而辨之者署爲今注
考文記而述之者又爲今按義旣刊定理亦詳明今以

新舊藥合九百八十三種并目錄二十一卷廣頌天下傳而行焉

唐本序

禮部郎中孔志約撰

蓋聞天地之大德曰生運陰陽以播物含靈之所保曰命資亭育以盡年蟄穴棲巢感物之情蓋寡範金揉木逐欲之道方滋而五味或爽時昧甘辛之節六氣斯沴易愆寒燠之宜中外交侵形神分戰飲食伺豐成腸胃之膏風濕候隙構手足之災機當作幾纏縻膚腠莫知救止漸固膏育期於夭折暨炎暉紀物識藥石之功雲瑞名官窮診候之術草木咸得其性鬼神無所遁情剗麝專犀驅洩邪惡飛丹鍊石引納清和大庇蒼生普

濟黔首功侔造化恩邁財成日用不知于今是賴岐和
彭緩騰絕軌於前李華張吳振英聲於後昔秦政煨燔
茲經不預永嘉喪亂斯道尚存梁陶景雅好攝生研精
藥術以爲本草經者神農之所作不刊之書也惜其年
代浸遠簡編殘蠹與桐雷衆記頗或踏駁興言撰緝勒
成一家亦以瑇瑁經方潤色醫業然而時鍾鼎時聞見
闕於殊方事非僉議詮釋拘於獨學至如重建平之防
已棄槐里之半夏秋採榆人冬收雲實謬梁米之黃白
混荊子之牡蔓異繁蔓於雞腸合由跋於鳶尾防葵狼
毒妄曰同根鉤吻黃精引爲連類鉉錫莫辨橙柚不分凡
此比例蓋亦多矣自時厥後以迄于今雖方技分鑣名

